修訂日期: 2004/11/17 發行日期: 2006/2/1

發行單位: 中華電子佛典協會 (CBETA) http://www.cbeta.org

資料底本: 大正新脩大正藏經 Vol. 2, No. 140

原始資料: 蕭鎮國大德提供◆張文明大德二校,維習安大德提供,北美某大德提

供

No. 140 [No. 125(51.7)]

阿那邠邸化七子經

後漢安息國三藏安世高譯

聞如是。一時婆伽婆。在舍衛祇樹給孤獨園。爾時阿那邠邸有七子。無篤信於佛 法眾。彼不歸命佛歸命法歸命比丘僧。亦不改殺生。亦不改不與取。亦不改他婬。亦 不改妄語。亦不改飲酒。爾時阿那邠邸長者告彼七子言。汝等。今可自歸命佛歸命法 歸命比丘僧。亦莫殺生。莫不與取。莫他妻婬。莫妄語。莫飲酒。皆悉莫犯。彼子作 是語。我不堪任歸命佛歸命法歸命比丘僧。莫殺亦不與取他婬妄語飲酒。皆不堪任。 阿那邠邸長者言。我當賜汝千兩金。汝等。可歸命佛歸命法歸命比丘僧。改莫殺生不 與取他婬妄語飲酒。皆悉改之。爾時七子已得千兩金。便歸命佛歸命法歸命比丘僧。 改不殺生不盜不他婬不妄語不飲酒。時阿那邠邸長者。與彼七子各賜千兩金。已授三 自歸受五戒。便往園至世尊所。頭面禮足在一面坐。時阿那邠邸白世尊言。我於此間 有七子無篤信意。亦無歡喜心於佛法眾。不自歸命佛歸命法歸命比丘僧。亦不改殺生 。不改盜。不改他婬。不改妄語。不改飲酒。世尊。時七子各各賜千兩金。便使歸命 佛歸命法歸命比丘僧。而授五戒。云何世尊。彼七子頗有福善諸功德。使後有所獲不 。世尊告曰。善哉善哉。長者。多饒益眾生。欲安隱眾生天人得安。長者。彼七子緣 是功德。諸善功德皆悉具足。諦聽彼七子所因功德諸善所獲果報。我今當說。此北方 有國城名石室。國土豐熟人民熾盛。彼有伊羅波多羅藏。無數百千金銀珍寶車渠馬瑙 真珠琥珀水精瑠璃及諸眾妙寶。彼揵陀賴國人。七歲中七月七日。或以裓盛抱戴。隨 其所欲皆悉費用。然彼伊羅鉢多羅藏無所減少。若復長者。彼七子及此伊羅鉢多羅大 寶藏彼七千兩金百倍千倍百千倍無數倍。皆悉不及汝七子所獲功德。長者。復有國名 迦陵磲。有城名蜜絺羅。穀米豐熟人民熾盛。彼有寶藏名般籌。無數珍寶金銀車磲馬 瑙真珠水精琉璃珊瑚琥珀。乃至迦陵磲國人民。七歲七月七日中。隨意所欲擔負多少 。無所減少。然彼迦陵渠國有所減少。若復長者七子。所有七千兩金。及般籌大寶藏 。於彼七千兩金。百倍千倍百千倍無數倍。皆悉不及七子七千兩金。所獲功德而無與 等。復有長者。鞞提師國城名須賴吒賓伽羅大寶藏。無數百千珍寶藏。金銀車磲馬瑙 真珠琥珀水精琉璃。於彼鞞提師國。七歲七月七日中。隨其所欲擔負多少。皆負持去 。於彼賓迦羅寶藏無所減少。若復長者七子七千兩金。及賓迦羅寶藏。此七子七千兩 金。百倍千倍百千倍無數倍。皆悉不及七子所獲功德。不可稱計。復有長者。加尸國

波羅奈城。彼有藏名蠰伽(龍名)。無數金銀珍寶車碟馬碯水精琉璃真珠琥珀。彼七子七千兩金。及此蠰伽大寶藏。彼七子七千兩金所獲功德。百倍千倍百千倍無數倍不如也。長者。置此乾陀越國人。捨此迦陵碟人。捨此鞞提施人。捨此迦尸人。猶如此閻浮提十六大國男女大小。彼盡隨其所欲擔負取此四大寶藏。金銀珍寶車碟馬瑙真珠琥珀水精瑠璃。彼於七歲七月七日中。隨其所欲皆悉擔負持去。彼四大藏無所減少。長者。彼七子七千兩金。及此四大寶藏。百倍千倍百千倍無數倍皆悉不及。是時世尊。便說偈言。

伊羅鉢乾陀 蜜絲及般籌 賓伽及須賴 蠰伽波羅奈 如此四寶藏 種種珍寶滿 無數不相及 所作功德果

爾時世尊與阿那邠邸。說微妙法勸令歡喜。時同那邠邸長者。已從如來聞微妙法 。即從座起偏露右肩右膝著地。叉手向佛白世尊言。願世尊。當受我請及比丘僧。欲 設甘露飲食。為彼七子故。時世尊默然受阿那邠邸請。時阿那邠邸已見世尊默然受請 。頭面禮足便退而去。還家即其日。施設甘露飲食。施設甘露飲食已即敷坐具。為佛 比丘僧故而白時到。今正是時。願世尊臨顧。是時世尊知時已到。便著衣持鉢。比丘 僧前後圍繞。入舍衛城詣阿那邠邸家。即就座坐及比丘僧。時阿那邠邸長者及七子便 至世尊所。頭面禮足在一面坐。時阿那邠邸長者白世尊言。我有此七子各賜千兩金。 使自歸命佛歸命法歸命比丘僧。使受五戒。今願世尊。與此等說法。使我等七子。於 如來所使逮等見。時世尊告阿那邠邸長者言。如是長者。如是長者。時阿那邠邸長者 。見佛比丘僧坐定。及七子以甘饌飲食而供養之。時阿那邠邸長者及七子。甘饌飲食 飯佛比丘僧。見世尊食竟除去鉢。時阿那邠邸長者便至世尊所。頭面禮足在一面坐。 時彼七子。如來與說微妙法。而世尊知阿那邠邸七子至心聽法。諸佛世尊常應所說法 苦習盡道。時世尊與彼阿那邠邸長者七子。說如是法。各於坐上諸塵垢盡。無有瑕穢 得法眼生。彼已見法。逮得深法無有狐疑。亦無猶預想得無所畏。以解了如來深法。 自歸命佛歸命法歸命眾。而受五戒。時世尊與阿那邠邸長者及七子。復重說法已便從 座起而去。是時阿那邠邸長者及彼七子聞佛所說。歡喜奉行。

阿那邠邸化七子經